



S E R M O N

VINGT-HVICTIESME.

ACTES CHAP. IV. VERSBT V.
VI. VII. VIII. IX. X. XI. XII.

Actes chap. IV. Vers. V. Or auint que
le lendemain leurs Gouverneurs s'assem-
blerent, & les Anciens & les Scribes en
Ierusalem.

VI. Et Anne souverain Sacrificateur, &
Caïphe, & Iean & Alexandre, & tous
ceux qui estoient de la lignée Sacerdo-
tale.

VII. Et les aians mis en place, les interro-
guerent disans; par quelle puissance, ou
au Nom de qui avez vous fait ceci?

VIII. Adonc Pierre rempli du Saint Es-
prit leur dit; Gouverneurs du peuple, &
vous Anciens d'Israel.

IX. Puis que nous sommes aujourd'huy re-
cherchez pour un bien qui a esté fait à
l'endroit d'un homme impotent, pour sa-

voir comment il a esté guéri.

X. *Soit notoire à vous tous & à tout le peuple d'Israel, que ça esté au Nom de Iesus Christ le Nazarien que vous avez crucifié, lequel Dieu a ressuscité des morts : voire en vertu du Nom de cettui ci cet homme assiste sain jci devant vous.*

XI. *C'est cette pierre qui a esté rejetée par vous les edificans qui a esté faite le principal du coin.*

XII. *Et n'y a point de salut en aucun autre : car aussi n'y a t'il point d'autre Nom sous le Ciel qui soit donné aux hommes par lequel il nous faille estre sauuez.*



omme apres la charge du Fils de Dieu, il n'en a jamais esté exercé aucune si noble & si importante dessus la terre que celle des Saints Apostres entant qu'ils ont esté appelez immediatement par lui mesme, & enuoiez par tout le monde pour y prescher son Euangile, & amener les Iuifs & les Gentils à sa connoissance & à son salut; aussi n'y en a t'il jamais eu de plus peinible, soit à cause des difficultez qui naissoient de la nature mes-

Actes cha. 4. vers. 5 6. 7. 8. 9. 10. 11. 12. 339
me des fonctions de ce glorieux ministre ; car auoir a abroger la Loi entre les Iuifs , à abolir l'idolatrie entre les Gentils, & à mettre en la place de l'vne & de l'autre la seule Foy de nostre Seigneur Iesus Christ , estoit par maniere de dire , auoir à remuer les bornes du monde , à transporter les montagnes hors de leur lieu, & à changer toute la nature des Elements : Soit à cause de la resistance des aduersaires & de la haine furieuse du monde contr'eux & contre leur doctrine : Car quelle contradiction n'a t'on pas fait contre leur predication ? & quelles persecutions n'a t'on pas suscitées contre leurs personnes ? Mais neantmoins ni toutes les difficultez des fonctions qui leur auoient esté ordonnées, ni toutes les malices & les fureurs de leurs aduersaires contr'eux & contre leur doctrine , ni tous les dangers qu'ils ont eu à courir , & qu'ils ont courus en effect à cette occasion depuis le premier iour de leur Apostolat iusques au dernier, n'ont pas peu empescher qu'ils n'en ayent entrepris l'exercice avec vn courage heroïque , & qu'ils n'y ayent perseueré avec vne constance inébranlable , & avec des succez qu'ils eussent eu peine de conceuoir eux mesmes auant qu'ils les vissent. Ce

n'est pas que de leur nature ils fussent plus capables de ces incomparables merveilles que tous les autres hommes ; car de quoi estoient capables de pures pecheurs, auxquels leur maistre a tant de fois reproché leur stupidité ? mais c'est que celui qui leur auoit mis vn si pesant fardeau sur les epaules, leur a donné la force necessaire pour le porter ; que celui qui a permis qu'ils fussent saisis, emprisonnez, & produits pour répondre deuant les Gouverneurs & les Magistrats , leur a donné en mesme temps, selon sa promesse, *une bouche & une sagesse à laquelle n'ont peu contredire ni répondre ceux qui leur estoient contraires* ; que celui enfin qui les a mis en ce rude combat , les a reueustus de ses armes , les a puissamment assiste de la grace de son Esprit , & les en a fait sortir vainqueurs & plus que vainqueurs par sa vertu. Tout ce liure des Actes nous en fournit plusieurs memorables exemples, comme vous le verrez cy apres , mais pour cette heure nous nous arresterons à celui que saint Luc nous presente en nostre texte , où nous considererons avec l'aide de Dieu trois choses : L'assemblée qui s'est faite des ennemis de Iesus Christ contre ces deux Apostres ; l'interrogation que

Actes cha. 4. vers. 5. 6. 7. 8. 9. 10. 11. 12. 34
que ces gens là leur ont faite, & la respon-
se libre & hardie que saint Pierre leur a
faite par le Saint Esprit.

Pour la premiere, vous voiez ici vne
grande conspiration des Gouverneurs du
peuple, des Anciens d'Israël, des Scribes
ou Docteurs qui estoient en Ierusalem,
d'Anne, de Gaïphe, d'Alexandre & de
sous ceux qui estoient de la lignée Sacer-
dotale, contre Dieu & contre son Oindre.
Ce n'estoit pas quelques mutins, ou quel-
ques pources ignorans de la lie du peuple;
c'estoit les Magistrats politiques, les Pre-
lats Ecclesiastiques, & toutes les person-
nes les plus notables, ou pour l'authorité
& la dignité de leurs charges, ou pour l'e-
minence de leur sauoir & de leur reputa-
tion, ou pour les auantages de leur nais-
sance & de leurs successions, qui fussent
en toute la ville. Car comme quand
le bruit de la naissance de nostre Sei-
gneur Iesus Christ s'épandit en Ie-
rusalem, au lieu qu'on y en deuoit faire
des feux de ioie, & des resiouïssan-
ces publiques, il est dit par l'Euangeli-
ste, *qu'Herode en fust troublé & toute Ieru-
salem avec lui*: ainsi dès que les saints
Apostres ont commancé à y annoncer
l'Euangile, c'est à dire la bonne nouvelle

de la venue, de la mort & de la resurrection du Seigneur Iesus pour le salut des hommes, au lieu que tout y deuoit eclater de icie & retentir d'Hymnes & de Cantiques d'actions de graces à Dieu pour les abondamment excellentes richesses de sa grace qu'il a si magnifiquement desploiées en l'enuoi de son Saint Esprit, & en l'effusion de ses dons, ils en ont esté tous remplis d'enuie & d'indignation, & se sont mutinez tous ensemble contre le Redempteur du monde, & contre la gloire de son Esprit, & n'ont rien espargné pour esteindre s'ils eussent peu cette belle & grande lumiere qui se presentoit à leurs yeux, & qui s'en alloit decouurer au monde leurs erreurs & leur vices. Ces malheureux estoient le plus souuent entres mauuaise intelligence les vns avec les autres, & s'entremordoient comme chiens; & vous voiez ici comme ils s'accordent quand il est question de se souleuer contre Christ, & de secouer le doux joug de son Euangile & de son Empire. Ainsi de tout temps les meschans ont esté joincts pour mal faire, Ainsi les Idumeens, les Ismaelites, les Moabites, les Ammonites, & les Philistins quelque discordans qu'ils fussent entr'eux, ont con-

sulsé

Actes cha. 4. vers. 5. 6. 7. 8. 9. 10. 11. 12. 343
sulsi d'un mesme courage ensemble, & ont
traitté alliance contre Israël, comme il est
dit Pl. 83. Ainsi Herode & Pilate qui
estoyent auparauant en querelle se sont
accordez contre Iesus Christ: Les Phari-
siens & les Sadduciens contre saint Paul:
Les Arriens, les Eunomiens & autres He-
reriques contre l'Eglise: Ainsi ces gens ici
ont verifié ce que Dauid en auoit predic-
tant de siecles auparauant, Que les nations
se mutineroient & que les Princes consulte-
roient ensemble contre l'Eternel & contre
son Oinct, pour rompre ses liens (Pl. 2.) & re-
jecter sa discipline.

Mais oions maintenant ce qu'ils firent estans assemblez. Ils produisirent saint Pierre & saint Iean deuant eux & les interroguerent: & ainsi ils estoient assis sur le Tribunal comme Iuges, & faisoient respondre les Apostres sur la sellette comme des criminels; mais vn iour ces mesmes Apostres assis sur des Throsnes les iugeront & les condamneront deuant Dieu & deuant le monde. Mais encore qu'est-ce qu'ils demandent à ces deux Ministres de Iesus Christ? *Par quelle puissance* (disent ils) *& au Nom de qui avez vous fait ceci?* Par ces mots on pourroit entendre, qui vous a donné ce pouuoir & cette autori-

ré de parler dans le Temple comme vous faites, & quelle vocation auez vous de prescher au peuple cette nouvelle doctrine que vous annoncez? Mais la réponse que saint Pierre fait à cette demande, monstre qu'il faut plüstoit entendre, Par la puissance & par l'authorité de qui auez vous fait cette guerison du boiteux? Car il leur respond, *Puis que nous sommes aujourd'huy recherchez pour un bien qui a esté fait à l'endroit d'un homme impotent, pour sauoir comment il a esté gueri, sçachez que ça esté au Nom de Iesus le Nazarien*; ce qui ne seroit pas à propos si on ne prenoit en ce sens l'interrogation des aduersaires. Mais dites moi vn peu ô gens malicieux! pourquoi vous leus faites cette demande? hier quand vous vinstes au Temple & que vous les trouuastes preschans au peuple, ne disoient ils pas hautement que c'estoit au Nom de Iesus; Et tout le peuple n'entendoit il pas tesmoignage? Dites la vérité: C'est sans doute que vous croiez qu'ils ont bien eu le courage pour le dire à vne troupe de peuple qu'ils ne redoutent pas, & qui se laisse aisement mener par le nez; mais qu'ils n'auroient pas l'assurance de le dire deuant des Magistrats, des Anciens, des Sacrificateurs & des Scribes; que l'au-
 thorté

Actes cha. 4. vers. 5. 6. 7. 8. 9. 10. 11. 12. 345
thorité & la presence d'une si venerable
assemblée leur eblouira les yeux, & leur
liera la langue, & que se souuenans de ce
que vous venez de faire à leur maistre, ils
apprehenderont que vous ne leur en fas-
siez autant: Et puis, c'est que vous les
voulez faire parler pour essayer de les sur-
prendre & de les enlacer en paroles. Vous
vous trompez, ce ne sont pas ici des hom-
mes qui parlent ou se taisent selon leurs in-
terests, & selon les mouuements de la
chair; ce sont des Ministres de Dieu qui
se meuent & qui agissent selon les inspi-
rations de son Esprit, qui n'est pas un Esprit
de timidité, mais de force & de sens rassis: &
que tous les hommes du monde avec tou-
te la subtilité de leurs questions ne sau-
roient surprendre ni enlacer.

Et de fait escoutez comment ils s'en
sont desmeslez. *Alors saint Pierre rempli
du Saint Esprit leur dit, Gouverneurs du
peuple & vous Anciens d'Israël, puis que nous
sommes aujourd'hui recherchez d'un bien
qui a esté fait à l'endroit d'un homme impo-
tent pour sauoir comment il a esté gueri, soit
notoire à vous tous, & à tout le peuple d'Is-
raël, que ça esté au nom de Iesus Christ le
Nazarië lequel vous avez crucifié, mais Dieu
l'a ressuscité des morts. Voir par la vertu*

du Nom de celui-ci, cet homme assiste saint
 ici devant vous : C'est cette pierre qui
 a esté reittée par vous les edifiants ,
 qui a esté faite le principal du coin , &
 n'y a point de salut en aucun autre. Car aussi
 n'y a-t-il point d'autre Nom sous le Ciel , qui
 ait esté donné aux hommes par lequel il nous
 faille estre sauués. Si ce poure pescheur
 eust parlé selon les sentiments de sa chair,
 il eust tremblé sans doute au rugissement
 de ces Lions ; il n'eust peu supporter l'es-
 clat de la presence de tant d'illustres per-
 sonages ; ils se fust teu ou de honte , ou de
 peur ; ou il eust respondu en paroles de
 lascheté & de complaisance charnelle , &
 eust enfin renié son maistre vne seconde
 fois. Mais saint Luc nous tesmoigne qu'il
 a fait sa response estant rempli du Saint
 Esprit , de cet Esprit qui conduit les cœurs
 comme il veut , qui en chasse la peur & y
 introduit le courage ; & qui quand il lui
 plaist des plus fragiles roseaux du desert
 fait les plus fermes colonnes de son Tem-
 ple : & cet Esprit ne le touchoit pas seule-
 ment en la superficie , mais remplissant de
 sa vertu toutes les facultés de son ame , lui
 a inspiré ces paroles de generosité & de
 sagesse tout ensemble que saint Luc nous
 rapporte ici. Où premierement dans les

Eloges

Actes ch. 4. vers. 5. 6. 7. 8. 9. 10. 11. 12. 347
El mesmes qu'il leur donne de *Gouuerneurs du peuple*, & d'*Anciens d'Israel*, il montre sa prudence, sa modestie, & son humeur respectueuse enuers ceux qu'il voioit estre constitués en dignité, encore qu'ils s'en montraissent indignes. S'il n'eust regardé qu'à ce qu'ils meritoient par leurs vices, & par leur mauuaise conduite, il les eust peu iustement appeler des tygres & des loups, des profanes & des hypocrites, des ennemis du Fils de Dieu & de son Esprit: mais on eut creu que c'estoit la passion qui le faisoit parler de la sorte, & on en eust re. en du scandale. C'est pourquoy au lieu de cela il les appelle des titres de leurs dignités, pour leur montrer que s'il les reprenoit de leurs vices & de leurs pechés, ce n'estoit pas par haine, par mespris ni par insolence; mais par deuoit de conscience, par zele à la gloire de Dieu, & par vne affection charitable à leur propre salut: & pour estre en exemple & aux Pasteurs, & aux particuliers de la reuerence qu'ils doiuent aux puissances superieures, quand mesmes leurs personnes seroyent tres-vicieuses, & leurs actions tres-iniustes. Et certes il importoit grandement à l'honneur du Christianisme & de l'Apostolat, qu'il apparust à tout le monde que les

Chrestiens & particulièrement les Apostres n'estoyent pas de ces audacieux contre lesquels declament saint Pierre & saint Jude qui mesprisent les seigneuries, & n'ont point d'horreur de blasmer les dignités contre lesquelles les Anges mesmes n'osent pas prononcer paroles de blasfeme. C'est pourquoy vous voies au 23. de cette histoire qu'estant arriué à saint Paul de dire au souverain Sacrificateur ces paroles peu respectueuses, *Dieu te frapera paroi blanche*, comme quelcun des assistans lui dit, *Est ce ainsi que tu parles au souverain Sacrificateur?* il s'en excusa disant *Je ne sauois pas qu'il fust le Sacrificateur, car il est escrit Tu ne mediras point du Prince de ton peuple.*

Mais ce respect n'empesche pas saint Pierre qu'il ne die franchement ce qui est de la verité, & au suiet dont ils l'interrogent, & en ce qui est de leur crime contre nostre Seigneur Iesus Christ, & de la resurrection par laquelle le pere l'auoit glorifié, & generalement en ce qui regardoit la doctrine de son Evangile, dont lui & ses Collegues auoyent esté esleus ministres. Quant au premier il dit, *Puis que nous sommes aujourd'hui recherchés pour un bien &c. soit notoire à vous tous &c. que ç'a esté au Nom de Iesus Christ le Nazarien.* Voies premierement,

Actes chap. 4. vers. 5. 6. 7. 8. 9. 10. 11. 12. 349
mierement, *Mes Freres*, comme pour de-
fendre leur innocence, & faire honte à
leurs ennemis de leur injustice, il loue
Dieu, & se glorifie de ce qu'il ne souffre
pas pour mal qu'il ait fait, mais au contrai-
re pour vne bonne œuvre. C'est de cette
mesme façon que nostre Seigneur Iesus
Christ se glorifioit & confondoit ses ad-
versaires quand il leur disoit, *Je vous ai fait*
plusieurs bonnes œuvres, pour laquelle, me la-
pidés vous. C'est la consolation qu'ont eu
aussi de tout temps les seruiteurs qui ont
souffert pour lui, qu'ils ne souffroyent pas
pour leurs malefices mais pour leurs bon-
nes actions, quoi que leurs ennemis pris-
sent d'autres pretextes pour leur mal faire,
& pour colorer l'injustice qu'ils leur fai-
soyent, & leur oster la gloire de souffrir
pour justice, ils les chargeassent de plu-
sieurs crimes dont ils estoient tres-inno-
cens; comme l'histoire nous apprend que
le practiquoit particulièrement Iulian l'A-
postat. Remarqués en second lieu, qu'il
ne dit pas, *Nous sommes recherchés pour*
vn bien que nous auons fait à vn homme
impotent, mais, *Pour vn bien qui lui a esté*
fait, pour reseruer toute la gloire de ce
miracle à celui qui en estoit le seul auteur,
sans en deriuier aucune partie sur ceux qui

n'y estoient interuenus que comme instrumens par leur parole & par l'attouchement de leurs mains. Ainsi nostre Seigneur Iesus parlant comme homme des grandes choses qu'il faisoit dire aux disciples de Iean Baptiste: *Allés, dites à Iean les choses que vous voyés & oyés, les auengles recourent la veue, les boiteux cheminent, les lepreux sont nettoyés les sourds oyent, les morts sont ressuscités, & l'Evangile est annoncé aux pures, Afin que tout l'honneur en fust rendu à Dieu son pere: & non pas, Je gueri les auengles, les boiteux, les lepreux, les sourds, & ie ressuscite les morts; afin qu'il ne semblast à ceux qui ne le consideroyent que comme vn simple homme, qu'il voulust depouiller Dieu de la gloire de ses miracles, & se l'attribuer à lui mesme.*

Après cela l'Apostre respond directement à leur interrogation, *C'est au Nom de Iesus le Nazarien que ceci a esté fait: c'est à dire, Ce n'a esté ni l'industrie humaine, ni l'art de la Magic, ni l'application d'aucune cause naturelle qui a produit ce grand miracle deuant les yeux de tout le peuple; ç'a esté la seule vertu infinie & toute puissante de ce Iesus que nous vous annonçons. Il l'auoit dit au peuple, il le dit encore à ce conseil: Car il preschoit par tout également*

Actes cha. 4. vers. 5. 6. 7. 8 9 10. 11. 12. 351
ment la verité de Christ, en particulier & en public, deuant le peuple, & deuant les Docteurs. Ceux qui exposent de la faulſe monnoie, ne la presentent qu'à la chandelle, ou à certaines gens qui s'y laissent aisement tromper; au lieu que ceux qui ont de bon argent, le mettent à toute heure entre toutes personnes, & ne craignent ni la touche, ni la coupelle. Ceux qui vendent des hapelourdes les monstrent deſſous le manteau en quelque coin obscur; au lieu que les bons & loyaux marchands deployent hardiment leurs marchandises en pleine place. Les charlatans vantent leurs drogues à vn peuple ignorant à qui ils font acroire ce qu'il leur plaist, mais ils n'oseroyent en parler deuant d'habiles Medecins, & s'ils ont peur d'estre surpris par les reuiseurs, ou attrapés en vn examen, ils ferment tout doucement boutique: ainsi ceux ou qui sauent que leur doctrine est faulſe, ou qui ne sont pas asſeurés par quelque raison inuincible, ou par quelque reuelation celeſte qu'elle soit veritable, la debitent asſeurement deuant des ignorans, & deuant des gens doctes ils tremblent & chancellent, apprehendans tousiours d'estre conuaincus du contraire. Mais les Apostres, qui estoient

parfaitement assurez par la reuelation qu'ils auoyent receue de Iesus Christ, de la doctrine qu'ils preschoyent, & qui estoient remplis du Sainct Esprit (comme il est dit ici de saint Pierre) la preschoyent hardiment & deuant tout le peuple & deuant les plus grands Docteurs, ne craignans point à quelque examen qu'on la mette, qu'elle soit jamais conuaincue d'erreur ni de mensonge. Aussi saint Pierre la propose non d'une voix basse & tremblante, mais d'un ton haut & esclattant, afin que tout le monde l'entende. *Soit no-
toire à vous tous, & à tout le peuple d'Israel
que ç'a esté au nom de Iesus le Nazarien;* Nous ne l'auons pas dit en secret seulement, nous l'auons dit à tout le peuple; Et ce que nous auons dit au peuple, nous vous le disons semblablement sans apprehender ni vostre sauoir, ni vostre autorité, sachans qu'il n'y a nul de vous, ni de tous les hommes du monde qui nous en puisse dementir. Voiés ie vous prie, *Mes Freres*, comme Dieu confond ses aduersaires. Ils pensoyent estouffer la voix des saints Apostres, & ils la font tant plus hautement retentir: Ils ne pouuoient souffrir que le peuple les escoutast, & ils les viennent escouter eux mesmes. Ils fo-
faischoient

Actes cha. 4. vers. 5. 6. 7. 8 9 10. 11. 12. 353
faisoient de ce qu'ils parloient ainsi librement de la verité & de la gloire de Iesus Christ leur Maistre ; & ces diuins Ministres de Christ la leur viennent prescher à eux mesmes dans leur propre Conseil , & avec autant de hardiesse qu'ils auoient fait au peuple dans le Temple.

Or parce qu'eux qui ne prenoient Iesus Christ que pour vn simple homme, & qui l'auoient veu mourir en la croix , & ne l'auoient pas veu depuis paroistre sur la terre , eussent peu estimer que c'estoit chose ridicule de dire, que ce fust en son Nom & par sa puissance que ce miracle eust esté fait , pour les tirer de cet erreur & tout ensemble leur reprocher leur crime il aioute , *Lequel vous avez crucifié , mais que Dieu a ressuscité des morts.* Il auoit desjà fait ce reproche d'auoir crucifié Iesus Christ à tout le peuple en general en ces deux remonstrances dont vous avez ouï ci deuant l'exposition : mais il le fait ici encôre plus justement à ces gens , comme à ceux qui auoient esté & les premiers Autheurs, & les plus ardens Promoteurs de cet horrible traitement ; & ne craint point la rage où ils entreroient contre lui & contre son Colleague , mais les reprend librement de leur crime pour leur en faire honne &

Z

horreur, afin qu'ils s'en repentent, & qu'ils se reconcilient avec Dieu par la Foi en son Fils, & que s'ils ne le font, ils soient rendus inexcusables deuant son iuste jugement; & en mesme temps il leur fait voir combien ils se sont abusez quand ils se sont imaginé en le faisant mourir d'enseuelir avec sa personne la vérité & la gloire en vn mesme tombeau; quand il leur dit, *Vous l'avez crucifié, mais Dieu l'a ressuscité des morts.* Ne pensez pas qu'il soit demeuré en la mort que vous lui avez procurée, car pour cette vie mortelle corruptible & calamiteuse que vous lui avez ostée par vostre injustice, Dieu lui en a rendu vne immortelle, incorruptible & glorieuse que vous ne lui pouuez pas oster, & l'a esleué à sa dextre d'où il opere maintenant à la seule inuocation de son Nom, ces grandes merueilles que vous voiez. En suite de quoi il leur monstre par les predictions des Prophetes que cela deuoit arriuer quand il ajoute, *C'est cette pierre qui a esté reiettée par vous les edifiens, qui a esté faite le principal du coin:* faisant allusion à ces paroles de David au Pseaume 118. *La pierre que les edifiens ont reiettée a esté faite le principal du coin.* Paroles qui ont esté appliquées au Messie à venir

Actes cha. 4. vers. 5. 6. 7. 8. 9. 10. 11. 12. 355
venir (Es. 28.) où Dieu dit, *J'asserrai en Sion une pierre esprounée, angulaire, precieuse & fondamentale; & au Messie venu tant par Iesus Christ mesme au 21. de saint Matth. que par saint Paul au 2. des Ephes. en ces mots, Vous estes edifiez sur le fondement des Apostres & des Prophetes, Iesus Christ lui mesme estant la maistresse pierre du coin: & par saint Pierre mesme en sa premiere Epi- stre chap. 2. en ceux ci Vous approchans du Seigneur qui est la pierre vine, qui a esté re- iettée des hommes, mais qui est esleüe & pre- cieuse enuers Dieu, vous aussi comme pierres vines estans edifiez, pour estre une maison spirisuelle & une sainte Sacrificature, pour offrir Sacrifices spirituels agreables à Dieu par Iesus Christ: à raison de quoi il est contenu en l'Escriture, voici ie mets en Sion la mai- stresse pierre du coin esleüe & precieuse, & qui croira en lui ne sera point confus: Elle est donc honneur à vous qui croiez, mais quant aux rebelles, la pierre que les edifiens ont re- iettée a esté faite la maistresse pierre du coin & pierre d'achoppemēt & de tresbuschemēt; loi vous me demanderez pourquoy cer- te divine pierre est appelée par l'Apostre la maistresse du coin, & si ie vous respons que c'est parce que le Prophete l'auoit*

ainsi appelée, vous me demanderez encore pourquoi il l'auroit ainsi appelée ? ie vous dirai donc que David qui a parlé le premier a regardé en ces paroles premierement à soi comme au Type, & puis à nostre Seigneur Iesus Christ, comme à celui duquel il estoit la figure. Entant qu'il les a dites de soi, il a vsé de cette métaphore, pour signifier qu'ayant esté au commencement rejezté par les *edifians*, c'est à dire, par ceux qui auoient l'autorité & la conduite en Israel, il a esté en fin reconnu & accepté pour Roi, premierement par la tribu de Iuda de laquelle il estoit ; & puis par toutes les autres tribus qui s'estoient séparées d'avec elle, & mesme lui auoient fait la guerre pour ce suiet, si bien qu'il les a routes réunies en vn sous son obeissance. Entant qu'il les a entendues de Iesus Christ, il l'a ainsi qualifié, parce que comme aux edifices materiels on met ordinairement les pierres les plus solides, & les plus massiues aux angles, ou aux encoigneures, parce que ce sont elles qui doiuent porter le plus grand faix du bastiment, soutenans les deux extremittez des murailles qu'elles ioignent ensemble ; aussi Dieu a choisi & mis Iesus Christ son Fils en l'Eglise, pour estre celui qui joindroit

Actes cha. 4. vers. 5. 6. 7. 8 9. 10. 11. 12. 357
joindroit en soi & sautiendroit par son incomparable vertu l'une & l'autre partie de ce mystique bastiment ; ie veus dire premierement l'Eglise qu'il s'est recueillie d'entre les Iuifs à laquelle il appartenoit selon la chair ; & puis celle des Gentils qui n'auoient rien de commun avec lui, & qu'il a neantmoins admis au temps qu'il auoit destiné à la participation de la grace. Il les appelle *les edifiens*, non qu'ils edifiassent en effect l'Eglise de Dieu, car au contraire, ils la destruisoient & la ruinoient entant qu'en eux estoit, mais parce qu'ils estoient en des charges qui les obligeoient à l'edifier, que Dieu leur auoit mis (par maniere de dire) l'equiere & le marteau en la main, pour bastir sa maison ; & qu'ils se glorifioient d'estre les Docteurs, voire les seuls Docteurs de son Israel. Et il leur reproche qu'il ont reiecté cette pierre, entant qu'ils n'ont pas voulu connoistre nostre Seigneur Iesus Christ pour le Fils de Dieu, & pour Sauueur du monde, mais qu'ils l'ont traité d'imposteur, & l'ont excommunié de leur Synagogue & tous ceux qui croiroient en lui ; qui a esté (veu leur qualité) vne incredulité horrible & tout à fait inexcusable. Car si ceust esté des Gentils qui ne

l'eussent pas voulu reconnoître , les tenebres où ils estoient nez , & dans lesquelles ils auoient esté nourris toute leur vie eussent rendu leur faute beaucoup moins estrange : Si c'eust esté quelques vns du commun des Iuifs , cela eust esté scandaleux à la verité , mais encore les excuseroit on en quelque façon sur l'ignorance qui est ordinaire au commun peuple ; mais que ç'ait esté ceux qui estoient assis en la chaire de Moÿse , & qui ayans esté nourris dans la Loi & dans les Prophetes , où les marques que deuoit auoir le Messie estoient si particulièrement designées , eussent deu esté les premiers à embrasser nostre Iesus en qui elles paroissent toutes si visiblement, que ç'ait esté, di. ie, ceux là qui l'ayent reietté si fierement & si obstinement , c'est en quoi est le comble du scandale: mais il leur dit que nonostant toute leur incredulité & toute leur malice cette pierre eleuë de Dieu a esté faite le principal du coin, c'est à dire que Dieu l'a posée & establie pour l'vnique & l'inebranlable soutien de toute son Eglise , aiant fait par ses nouveaux Ministres ce que les anciens auoient refusé de faire , qui a esté d'edifier toute son Eglise sur Iesus Christ.

Finale^{ment}

Finalemēt il conclud son discours par vne sentence fondamentale à la Religion du Nouveau Testament : sentence à laquelle si les Chrestiens se fussent tenus aussi religieusement qu'ils deuoient , ils n'eussent pas donné lieu à beaucoup d'erreurs & d'abus dont ils se sont souillez depuis long temps , mais se fussent maintenus purs en la Religion que nostre Seigneur Iesus Christ leur auoit enseigné par ses Apostres, à sauoir qu'il n'y a salut en autre qu'en lui , & qu'il n'y a point d'autre Nom sous le Ciel , c'est à dire , selon le style de l'Escriture , point d'autre personne , qui soit donné aux hommes , par lequel il nous faille estre sauuez. C'est là Mes Freres , l'vnique moien de salut : Il ne le faut pas chercher en Moyse , ni quant à la personne , car il a esté pecheur comme nous , & s'il n'a peu introduire le peuple dans la Canaan terrestre , beaucoup moins a t'il peu l'introduire dans la celeste : ni quant à la Loi , car elle n'ameine rien à perfection, & n'a pas esté donnée pour visifier. Il ne faut pas le chercher aux Anges , car ils ne sont que des Esprits administrateurs enuoiez pour ceux qui doiuent receuoir l'heritage de salut , & non des Sauueurs & des Redempteurs pour nous l'acquerrir & nous le

donner. Il ne le faut pas chercher en la sainte Vierge, qui a eue besoin d'un Sauueur, & de la misericorde de Dieu aussi bien que tous les autres pecheurs, comme elle le tesmoigne dans son Cantique. Il ne le faut pas chercher aux Saints qui ont esté sujets aux mesmes infirmités que nous, & sont paruenus au salut de Dieu par la mesme misericorde de laquelle nous l'attendons tous : Non pas mesmes aux Martyrs, car comme a tres bien dit vn ancien Euesque de Rome, *Encore que la mort de plusieurs Saints, ait esté precieuse deuant le Seigneur, neantmoins l'occision d'aucun innocent n'a esté la propiciation du monde; les iustes ont receu, mais n'ont pas donné les couronnes, & de la Foi des Fideles sont nez les exemples de patience & non les dons de justice.* Il ne faut pas en fin le chercher en nous mesmes, en nos satisfactions, ni en nos iustices, car nous sommes tous transgresseurs dès le ventre, & parce que nous ne sommes iamais sans vice tant que nous sommes en ce monde nous auons tous les iours besoin de demander à Dieu pardon de nos pechez, bien loin de lui pouoir satisfaire parfaitement, ou meriter de lui son grand salut. Il le faut chercher en Iesus Christ
seul

Actes cha. 4. vers. 5. 6. 7. 8. 9. 10. 11. 12. 36.
seul, qui nous a esté fait de par le Pere sapience, justice, sanctification, & redemption; C'est en luy seul que nous trouuons tout ce qui est necessaire pour estre sauuez: car le bon plaisir du Pere a esté que toute plénitude habitast en lui, afin que de sa plénitude nous puissons tous grace sur grace; c'est lui (dit l'Apostre Heb. 7.) qui peut sauuer à plein, c'est à dire, pleinement, parfaitement, absolument, tous ceux qui s'approchent de Dieu par lui: car Dieu ne nous l'a pas donné pour estre l'un de nos Sauueurs, ou nostre Sauueur à demi, mais pour estre nostre parfait & vnique Sauueur. C'est à lui qu'il nous faut tenir, pour mettre & terminer en lui toute nostre science, toute nostre justice, toute nostre connoissance, toute nostre felicité, & toute nostre gloire, si nous sommes vraiment Chrestiens, & si nous voulons estre sauuez. Il n'y a (dit saint Pierre) salut en aucun autre qu'en Iesus Christ & aucun autre Nom sous le Ciel qui ait esté donné aux hommes, par lequel il nous faille estre sauuez.

Toutes ces choses, Tres-chers Freres, ont esté dites à ces Gouvernours, à ces Anciens, à ces Scribes & à ces Sacrificateurs, qui s'estoient assemblé contre les

Apostres: mais ce n'a pas esté pour eux seuls, ç'a esté pour l'instruction des fideles de tous les Siecles, & de tous les peuples du monde, & ce que maintenant elles viennent de nous estre leues & exposées, c'est afin qu'elles servent particulièrement à la nostre. **Considerons donc** serieusement tout ce qui nous a esté deduit sur la procedure des ennemis de nostre Sauveur & de la verité, & sur le discours que leur fit saint Pierre. Nous auons veu premierement comme tous ceux qui auoient les Charges publiques; tant pour la Religion que pour la Police en la ville de Ierusalem se sont souleuez & liguez, non tant contre la personne des saints Apostres, que contre la gloire de Iesus Christ qu'ils voioient éclatter au miracle qu'il auoit fait par leurs mains: Et de là nous deuous apprendre deux choses, l'vne de ne nous estonner pas quand nous voions toutes les puissances du monde faire la guerre à Iesus Christ, & tous les grands Docteurs de la terre s'opposer à son Euangile; mais de nous assurer que si le Diable & le monde continuent à conspirer contre la verité & contre son reigne, ils n'en auront pas meilleur succez qu'ils ont eu en ce commencement de **ME.**
glise,

Actes cha. 4. vers. 5. 6. 7. 8. 9. 10. 11. 12. 363
glise, & en tous les Siecles suiuaus, & que
nostre Seigneur Iesus qui voit & regarde
du Ciel tous leurs somplots & tous leurs
monopoles, saura bien les confondre par
sa sagesse & les dissiper par sa puissance;
qu'il saura bien malgré tous leurs efforts
donner cours à son Euangile; proteger ses
bons seruiteurs; renuerser tout à fait,
quand il en fera temps, le throsne de son
aduersaire; faire entrer en son Temple la
plenitude des Gentils; conuertir à soi tout
son Israël; lier Satan pour ne pouuoir plus
seduire les nations, donner paix à son
peuple apres toutes ses agitations, & se
faire reconnoistre par tout le monde.
L'autre, de nous vnir ensemble pour la
propagation de la verité, & pour l'auan-
cement de son Reigne, comme nous
voions qu'ils se liguent & s'vnissent pour
l'empescher: S'ils s'accordent au mal com-
me font les Demons, accordons nous au
bien comme font les Anges Esleus; & si
nous les voions contribuer comme à l'en-
ui tout ce qu'ils ont d'industrie, de sauoir,
de puissance & d'authorité à l'execution
de leurs pernicieux desseins, qu'ils nous
voient contribuer encore plus volontiers
tout ce que Dieu nous a donné de con-
seil, de science, de credit & de pouuoir

dans le monde, à la gloire de nostre Maître, à la defence de la verité, & à l'avantage de son Eglise: *Servons le tous d'une mesme espaule*, (comme dit Sophonie, 3. 9.) & nous representons combien cette sainte conspiration lui sera agreable; combien elle attirera dessus nous de benedictions du Ciel, combien les Anges qui nous gardent en auront de contentement, & combien volontiers ils s'emploieront à nostre defence, quand ils nous verront ainsi vnis par les mesmes affections, & pour les mesmes fins qui les vnissent les vns avec les autres.

Nous avons entendu en suite comme les aduersaires de Iesus Christ ont fait amener de la prison S. Pierre & S. Iean deuant leur Conseil, & les ont fait respondre comme criminels. Ils auoient bien pis fait auparauant quand ils auoyent fait paroistre nostre Seigneur lui mesme, & qu'ils l'y auoient condamné comme vn blasphemateur, & vn seducteur. C'est là vn grand desordre, mais qui n'est que trop ordinaire dans le monde, que les meschans fassent le procès aux gens de bien; que ceux que Dieu a establis pour iuges sur la terre, abusent meschamment contre les seruiteurs du pouuoir qu'il leur a donné pour l'employer,

Actes cha. 4. vers. 5. 6. 7. 8. 9. 10. 11. 12. 369
ploier contre les ennemis, & que ceux qui
deuoient estre les protecteurs de l'innocence en soient les plus violents oppresseurs. Si vous voyez *Mes Freres* cette injustice & cette confusion sur la terre, & qu'il vous arriue d'estre mal-traittez à cause de la verité & du pur seruice de Dieu dont vous faites profession, ne vous en scandalisez pas. Vous seruez vn bon Maistre qui saura bien vous garantir au temps & en la maniere qu'il lui plaira de la violence du monde; & s'il vous appelle à souffrir, souffrez patiemment, car vous ne souffrirez pas longuement, quand mesme vous deuriiez souffrir toute vostre vie, car d'vne vie si courte les maux ne sauroient estre longs. Vn iour viendra que vous iugerez vous mesmes vos juges, & que l'Eglise qui est assise aujour d'hui sur la selette, sera assise sur le Throane, & rendra confuse toute langue. En attendant cela, possédez vos ames en patience, & que leurs iniustices & vos souffrances, vous facent soupirer avec tant plus d'affection apres cet heureux iour auquel il fera cesser ces desordres, & rendra à chacun selon ses ceuures.

Voila le fruit que nous deuons tirer de la procedere de ces meschans; mais voyez

maintenant ceux que nous devons recueillir de la responce de saint Pierre. Elle a esté toute diuine, premierement, parce qu'il la faite (comme dit saint Luc) *estant rempli du Saint Esprit* qui lui a suggeré à l'heure mesme ce qu'il auoit a dire pour l'honneur de son Maistre & pour la confusion de ses ennemis, conformément à cette promesse de Iesus Christ, *Vous serez menez deuant les Gouverneurs & les Magistrats à cause de moi, mais n'ayez point de souci comment vous parlerez, car en ce mesme instant vous sera donné ce que vous aurez à dire, ce ne sera pas vous qui parlerez, ce sera l'Esprit de vostre Pere qui parlera en vous.* Ce qui doit donner vn grand courage à ceux que Dieu appelle à le glorifier par la confession de son Nom deuant les puissances du monde; car il ne manque iamais aux siens en cette occasion. Cela n'est pas arriué seulement aux Apostres, mais à tous les autres Fideles qu'il a mis en telles espreues. De là sont venus tant de discours & de responces admirables que nous lisons en l'histoire de nos Martyrs, auoit esté faites par des gens de basse condition & sans lettres, qui ont confondu les plus grands Docteurs. Celle ci a esté encore toute diuine, parce qu'elle

Actes cha. 4. vers. 5. 6. 7. 8. 9. 10. 11. 12. 367
a esté prudente & tres-moderée & neant-
moins genereuse & tres-libre : Car en-
core qu'il eüst suieût de leur parler avec
grande indignation , & de leur donner les
titres que meritoient leur insolence & leur
malice , il les a appelez *les Gouverneurs du*
peuple , les Anciens d'Israël , & les edifiants ,
c'est à dire les Architectes de la mai-
son de Dieu ; c'estoit des Eloges d'hon-
neur qui estoient deus proprement
à saint Pierre & à ses Collegues , qui
estoient les vrais Gouverneurs du nou-
veau peuple de nostre Seigneur Iesus
Christ , qu'il auoit mis sur douze
Throsnes pour juger les douze Tribus
d'Israël ; qui edifioient vraiment sa mai-
son , & qui auoient aporté en vn iour trois
mille pierres vives , & en vn autre iusques
à cinq mille ; & non pas à ces gens ici qui
auoient reietté la maistresse pierre du coin
& qui ne travailloient à rien tant qu'à dis-
siper tout l'edifice : Et neantmoins il leur
donnoit ces titres , parce qu'encore qu'ils
ne s'acquittassent pas des fonctions auquel-
les leurs charges les obligeoient , tant y a
que Dieu les y auoit appelez par les for-
mes ordinaires & solennelles qui s'obser-
uoient au milieu de son peuple ; & parce
qu'il vouloit les adoucir par là & montrer

à tous les Fideles comment ils se doivent conduire à l'endroit des personnes qui sont constituées en dignité, encore mesme qu'elles en abusent. C'est à nous *Treschers Freres*, à imiter la modestie, à rendre honneur à qui honneur, & à porter toujours reuerence aux puissances supérieures, quand mesmes elles nous feroient iniustice : Si nostre deference & nostre humilité ne nous les rendent plus equitables, nous aurons fait nostre deuoit & les aurons mis en leur tort.

Mais neantmoins saint Pierre pour leur parler ainsi respectueusement n'a pas laissé de leur dire la verité avec vne generosité digne d'un Apôstre, en leur disant premierement, que lui & ses Collegues estoient recherchés non pour blasfeme, pour sacrilege, pour adultere, pour larcin ou pour meurtre, mais pour vne bonne œuvre, pour la guerison d'un malade de quarante ans. En quoi ces meschans là abusoient à la censure des bonnes actions, d'une puissance qui leur avoit esté donnée pour la punition des mauuaises: Car cōme nous enseigne saint Paul, le Magistrat est *seruiseur de Dieu pour faire justice & vengeance de celui qui fait mal*, & non pas pour se faire craindre de celui qui fait de bonnes

bonnes œuvres. Ils ne recherchoient pas une infinité de jureurs, de blasphémateurs, de meurtriers, de trompeurs & de raufiteux qui estoient parmi eux, & ils emprisonnoient & traittoient comme mal-faiteurs des gens d'une vie innocente, qui leur annonçoient leur salut, qui faisoient du bien à tous, & qui tout fraischement en venoient de faire un tres-grand à un pource impotent qu'eux mesmes auoient veu durant tant d'années à la porte du Temple affligé d'un mal incurable, & qu'ils voioient alors deuant eux en parfaite santé. Ainsi aux lieux où reigné l'inquisition on souffre toutes sortes d'infamies, de meurtres & de crimes, & qu'on recherche, on condamne, on expose aux supplices les plus cruels, les fideles seruiteurs de Dieu, non pour autre raison que parce qu'ils le seruent purement selon la parole: Mais comme l'iniustice qu'on faisoit alors aux Apostres leur estoit une matiere de gloire, aussi celle qu'on fait aux Fideles leur doit estre un suiet d'une grande consolation, car (comme dit saint Pierre) *il vaut mieux que nous souffrions en bien-faisant, si telle est la volonté de Dieu, qu'en mal-faisant: Partant si quelcun souffre comme Chrestien qu'il ne le prenne pas à bon-*

*re, mais qu'il en glorifie Dieu : (1. Pi. 2. 15.)
 Bien-heureux sont ceux qui souffrent pour ius-
 tice, car le Royaume des Cieux est à eux.
 (Matth. 5. 10.)*

Après cela saint Pierre leur a dit la ve-
 rité de ce dont ils l'interrogeoient, en leur
 déclarant hautement que ce miracle dont
 il estoit question auoit esté fait au Nom
 de Iesus, encore qu'il n'ignoraît pas com-
 bien ce Iesus qu'ils auoient fait mourir en
 vne croix leur estoit odieux, & combien
 ils s'irritoient de cette declaration. Ils
 auoient crucifié le Seigneur de gloire, &
 il le leur reproche en face, *Vous l'auex cru-
 cifié, mais Dieu la ressuscité des morts, voire
 en vertu du Nom de cettui ci, cet homme as-
 siste sain ici deuant vous. Dites & faites
 tout ce que vous voudrez contte lui, vous
 n'empelcherez pas sa gloire, car il faut en-
 fin qu'au Nom de Iesus tout genouil se ploye,
 de ceux qui sont aux Cieux, en la terre &
 dessous la terre. Ainsi sommes nous tous
 obligez, Mes Freres à confesser son saint
 Nom deuant qui que ce soit quand tous
 les hommes de la terre & tous les Demons
 de l'Enfer en deuroient enrager, nous sou-
 uenans tousiours de ce qu'il nous a dit
*Qui me confessera deuant les hommes, ie le
 confesserai deuant mon Pere qui est au Ciel,*
*mais**

Actes cha. 4. vers. 5. 6. 7. 8. 9. 10. 11. 12. 371
mais qui me veniera ie le renierai aussi. Nous
ne le pouuons pas confesser ainsi deuant
ses ennemis sans leur reprocher leurs er-
reurs, leurs abus, & leurs fureurs contre
la verité, ni les leur reprocher sans encou-
rir leur indignation, mais nonobstant ce-
la nous le deuons faire avec zele & avec
courage sans estre rien espouuantez par
eux quoi qui nous en doie arriuer, puis
que c'est pour la gloire de nostre Maistre;
nous le deuons mesme par charité, pour
les obliger à se conuertir; s'ils ne le font
nous auons deschargé nos ames, & au-
rons *attiré des charbons de feu sur leurs*
testes.

Souuenons nous en suite de ce que dit
iei l'Apostre que *Iesus Christ est cette pierre*
que les edifiants ont reiettée, mais qui a esté
faite le principal du coin. Ceux qui l'ont
reiettée ont esté les edifiants, les Archite-
ctes de la maison de Dieu, ceux qui
esloient assis en la chaire de Moïse, & qui se
portoient pour souuerains Iuges des dog-
mes de la Religion: Mais comme saint
Pierre sans auoir aucun egard à leurs titres
ni à leurs qualitez, s'est tenu attaché à cet-
te pierre esleue & precieuse, & a exhorté
les autres à s'en approcher, pour estre edi-
fié sur elle; ainsi quand nous voions au-

jourd'huy ceux qui se glorifient du titre de souverain Juge des controuerses de la Foi, de la succession de leur chaire, & du superbe priuilege de ne pouuoir errer, rejeter cette mesme pierre, condamner la verité de son Euangile, & persecuter tous ceux qui l'enseignent, & qui la suiuent; nous ne deuous pas laisser sans auoir egard à toutes leurs pretentions, ni à toute la pompe des qualitez qu'ils se donnent de nous tenir tousiours fermement & inseparablement attachez à nostre Seigneur Iesus Christ, pour edifier sur lui nostre Foi, & esleuer toutes nos esperances sur sa satisfaction & sur son merite: Car comme dit saint Paul, (Cor 3. 11.) *Nul ne peut poser un autre fondement que celui qui est posé, lequel est Iesus Christ.*

Mais ce que nous deuous sur tout imprimer en nos cœurs & en nos memoires, c'est la sentence par laquelle ce diuin Apôstre a fini son discours, aſcauoir, *qu'il n'y a salut en aucun autre qu'en Iesus Christ* Aions la donc sans cesse deuant les yeux comme la Maxime fondamentale de la Religion Chrestienne. Que les superstitieux qui sont norris dans l'ignorance du mystere de l'Euangile & de la doctrine des saints Apôtres, cherchent leur salut si bon
le ur

Actes cha. 4. vers. 5. 6. 7. 8. 9. 10. 11. 12. 373
leur semble aux saints, aux Anges, en la
Vierge Marie, en leurs images, en leurs
pelerinages en leurs satisfactions, & en
leurs merites: Nous, *Mes Freres*, qui auons
esté norris en vne meilleure eschole &
sous la discipline du S. Esprit, rejettons
loin de nous toutes ces vanités, tous ces
inutiles amusements, tous ces faux mo-
yens de salut que l'esprit d'erreur a inuen-
té pour aneantir la Croix de Christ, & de-
stourner les hommes du seul veritable
moien de leur reconciliation avec Dieu;
& nous tenons à nostre Seigneur Iesus
Christ seul, qui a fait la propiciation de
nos pechés par son sang, qui nous a meri-
té le Ciel par son obeissance, qui nous y
est allé preparer la place, qui intercede
continuellement pour nous à la dextre de
Dieu son pere, & qui seul *peut sauuer à plein*
tous ceux qui s'approchent de Dieu par lui:
Que ce grand Redempteur en qui sont ca-
chés tous les thresors de sapience & d'intelli-
gence, en qui toute plenitude de grace, de
benediction & de salut abonde, soit tou-
te nostre science, toute nostre religion,
toute nostre consolation, & toute l'espe-
rance de nostre gloire. Alors nous mon-
strerons nous vrais Chrestiens ne respi-
rans que Christ, n'estans qu'en Christ, &

ne soupirans qu'après Christ. Alors nous serons vraiment assurez de nostre reconciliation avec Dieu par l'efficace de son sang. Alors il fera abonder sa grace en nous en connoissance, en sainteté, en consolation & en toutes sortes de biens. Alors chacun de nous pourra dire durant sa vie comme disoit le grand Apôstre, (Gal. 2. 20.) *Je vis non plus maintenant moi, mais Christ vit en moi; & ce que ie vi maintenant en la chair, ie le vi en la foi du Fils de Dieu, qui m'a aimé & qui s'est donné soi mesme pour moi: Et le tenant entre ses bras à l'heure de la mort lui chanter comme Simeon, (Luc. 2.) Seigneur tu laisses maintenant aller ton seruiteur en paix selon ta parole, car mes yeux ont veu ton salut: Et quand enfin il descendra des Cieux pour se rendre admirable en tous les saints, il nous mettra à sa main droite, & nous recueillira tous ensemble sur son char trionfal dans son Royaume celeste, pour lui en rendre, comme aussi au Pere & au S. Esprit tout honneur & gloire. Ainsi Soit Il.*

SERMON